

In mais da pais

Las lingias grassas e finas dal zercladur 2020

DA DAVID TRUTTMANN/FMR

En tgenina «directiun» giain nus? Quella dumonda è stada il fil cotschen tras il mais da zercladur. In mais detg «directiv».

La directiva principala da quest mais han dà tras las autoritads federalas e chantunals: Enavos a la vita (pli u main) normala! En il chantun Grischun è vegnida proclamada la «situaziun normala», a nivel svizzer in pau main «normala». Da nov er en cumbinaziun cun ina app da contact tracing che duai dar a nus ina buna directiun. Quella «SwissCovid»-app sa perfin tiptop rumantsch. Silmain rumantsch grischun. E gea, exact uschia èsi cun quest rumantsch grischun – sco in virus.

Laax ha in entir furmicler stuì midar directiun, v.d. far midada. En in'acziun bunamain clandestina, la damaun fitg matutin, cura che las povras furmiclas èn anc «sterias», han incumbensads dal chantun transportà in furmicler var 400 meters en in'otra directiun, en in lieu nua ch'ils povers insects pon survivor. Ina bell'acziun a Laax. Ma savevas vos insumma avant quest'acziun ch'i dettia in'inschignera incumbensada dal chantun Grischun bel ed aposta per dumondas da furmiclas? Quasi ina sort «Uffizi chantunal da furmiclas». Tge chaussas! I dat purs che giavischassan in tal uffizi era per lufs, per far midada cun quels.

Müstair vegn fatg actualmain in sviament en directiun Tirolo. E durant las lavurs da construcziun, sper la claustra da Müstair, èn vegnidas chattadas restanzas dal temp carolingic e forsa perfin dal temp roman. L'entir areal da la claustra da Müstair tutga senza dubi tar ils lieus ils pli bain perscrutads archeologicamain en Svizra. Mintga crap è gia vegnì barschunà, fotografà e documentà. E sch'i vegniss ora proximamain anc ossa da dinosauriers sut la claustra, alura na fiss quai per ils Jauers nagina surpraisa, mabain be la con-



ferma ch'era quels animals levon a lur temp visitar la pli bella val dal mund.

Er il Teater Cuir ha in nov directur, in Roman rumantsch ed in Rumantsch da vaglia. Mo senum da famiglia è en temps da debattas davart rassissem in pau delicat: «Weishaupt». As imaginai las protestas, sch'el avess in num dad outra color... ma laschain las discussiuns sco tar las dultscharias da Dubler. Tuttina han quellas discussiuns cuntanschì er il Grischun: Co statti p. ex. cun ils «morins», ils ureglins tradiziunals da l'Engiadina che vegnan purtads da las dunas en constum engiadinais? È quel cliniez anc lubì en temps da «black lives matter»? La discussiun è interessanta. Ans imaginain il cuntrari: Co fissi per nus sch'in pievel en Nova Guinea purtass tar

il costum tradiziunal in ureglin cun si in chatschader cun brissago e stutzer da caliber grischun?

Cuir ha già lieu quest mais in spectacul extraordinari: la sessiun dal Cussegl grond. Quai ch'è uschiglio sitg sco in tof è questa giada stà spectacular en pliras directiuns. 1. La sessiun ha già lieu en la halla da la citad da Cuir, ina halla immensa per Higa's ed Oktoberfests. En quella halla generusa ha la distanza sociala pudì vegnir garantida envers tuts, betg mo envers ils socialdemocrats. 2. Il parlament ha crititgà massivamain ina da las instituziuns centralas d'in stadi – la giudicativa, il Tribunal chantunal. 3. Igl ha darar dà ina sessiun grischuna nua che deputadas e deputads han decis da spender tants raps, en in «hui» var 150 milliuns francs. Raps per corona e digitalisaziun. Sto esser che deputadas e deputads èn sa laschads in-

fluenzar dal mantra da la Higa e dal Oktoberfest: Dar ora raps.

Las quatter vischnancas da la Muntogna da Schons èn suandadas la directiva chantunala dals davos onns: fusiunar! La fin d'emna passada han votantas e votants decis cleramain da fusiunar. Mo insatge è donn tar questa maridaglia: Quatter bels nums rumantschs svaneschan da la carta politica: Donat, Lon, Maton e Casti-Vargistagn. Quai tunava uschè melodius sco tar chanzuns dal famus cumponist sutsilvan Tomasch Dolf.

«directurs» u silmain presidents e secretaris èn ids e vegnids en rotschas quest davos mais: *Martin Gabriel* sa retira sco secretari general da la Lia Rumantscha, *Nicolas Pernet* è il nov directur dad RTR, *Beat Röschlin* va da Tujetsch, *Martin Cavegn* vegn. En Bregaglia va ina Giacometti ed i vegn in Giovanoli. E *Stefan Engler* dat giu il presidi da la PCD. Be il retg da las Alps resta, il capricorn. Avant exact 100 onns èn ils capricorns vegnids engulads en Italia e mess or en il Parc naziunal. Ussa fan els parada sin la vopna grischuna, els fan reclama sco «Gian e Giachen» per il turissem grischun ed ils «Capricorns» giran sco novas locomotivas tras il Grischun. La dumonda è ussa sch'els na fissan betg fitg adattads era sco derschaders chantunals u sco secretaris da la Lia Rumantscha? U sch'els na fissan betg perfin buns presidents per la PCD. Il «capricorn» entschaiva gea cun in «C» – la baselgia fiss engraziavla.

In mais da pais

(fmr/dat) Tgeninas èn stadas las lingias grassas e finas dal mais passà en Rumantschia, en Grischun ed insumma? Quai ans dumandain nus da la FMR mintga fin dal mais. Tge paisa e tge paisa mo in zichel? Nus laschain repassar schabetgs, dain ina survista casuala e commentain quai cun in surrir. Mais per mais illustrescha il Bregagliot rumantsch *Jon Bischoff* il «Mais da pais» cun in «schurnal grafic».